

INUIT ATAQATIGIIT INATSIARTUNI



UPA2023/162

16. maj. 2023

Mariane Paviasen

**Qanoq iliornikkut nunatsinni ujarak sanaartornermi
atorluarnerusinnaavarput, qisunnillu eqqussuiuarnerup annertoqisup
apparsarnissaa anguniarlugu apeqquteqaat aallavigalugu
oqallisissiatut siunnersuut**

(Inatsisartunut ilaasortaq, Aqqalu C. Jerimiassen, Atassut)

Oqaaseqaat:

Inuit ataqatigiit sinnerlugit oqallisissiarinnittoq oqallisissiamut pingaaruteqartumut qutsavigaarput.

Qanga siuligut nammineerlutik nunatta pissarititaat atorlugit illuliortarsimanerat oqaluttuaannangorpoq, tikineqarpugut oqarfigineqarlutalu nammitsinnik illuliortarnerput atorsinnaangitsoq allamiilli tikisitanik illuliortarutta pitsaanerusoq peqqinnarnerullunilu. Oqarsinnaangilanga tamanna eqqortuusooq, maannakkummi aqqusaagarput qiviaannarutsigu sumilluunniit sanaartorniarutta avataaniit tikisitat atortarpagut maannakkullu nunatsinni annertuumik aserfallassimasunik, iluarsartuuneqartariaqartunik, peqqinnangitsunik akisuunik ineqartitserneq nalinginnaasunnngornikuuvoq.

Nunatta pissarititai atorluarlugit ineriartortillugit taamanerniilli iliuuseqarsimagutta pitsaanerusimassannginnerpa? Piffissanngunngila maannangaaq nammineq nunatta pissarititai piorsarlugit ingerlatilerutsigit?

Nunarput peqartorujussuuvoq, aatsitassaatigut piumaneqartorujussuupput, sooruna uagut nammineq paaaveqalinngilagut nunatta iluani atorluarsinnaasatsinnik sanaartornerup iluani atortussianik pilersitsiortorluta taamaaliornikkut avammut niuernerput annertusarlugu?

INUIT ATAQATIGIIT INATSISARTUNI



Kina oqarami nunatsinni orpinnik amerlanernik naatitsiortorsinnaangitsugut? Islandimi orpiit naapput, suna uagut aporfigaarput nunatsinni annerusumik orpinnik ikkussuinissatsinnut siunissami atorlualerumaagassatsinnik pilersitsigutta?

Inuit Ataqatigiinni isumaqarpugut periarfissaqarluartugut, iliuuseqarnissamulli sulii immitsinnut unitsittartugut, aporfilersorlotalu assersuutissaqqittorujussuuvoq siorna siunnersuut qaqqinneqartoq imaattoq:

"Siku Blocki malillugu nunatsinni sanaartornermut atugassatut pilersitsisoqarsinnaanera, taamaaliornikkut nunatsinni illuliornerup aningaasatigut imminut nammassinnaasumik ingerlanissaanut ilapittuutinngorlugu periarfissiuunnissaa pillugu Naalakkersuisut UKA2022-mi nassuiaammik saqqummiusseqqullugit peqquneqarnissaannik Inatsisartut aalajangiiffigisassaattut siunnersuut."

Siunnersuummi 2021-mi qaqqitanni siunertaagaluarpoq nunatsinni sanaartorluni atortussiap pitsassuusup atornerulernissaannut siunnersuuteqarnissaq, siunnersuuteqarniaraangatta nalunaarusioqquneqartarneq naliginnaasuuvoq suliaritinniakkap qanoq akeqartussaana il.il ilisimaqqaartariaqartaratsigit. Amerlanerit ataatsimiititaliallu naalakkersuisut allannguutissatut siunnersuutaat akueraat. Tassalu nunatsinni sanaartornerup iluani atortussianut tunngasumik nalunaarusiortoqassasoq taannalu saqqummereernikuuvoq.

Siku Block-ip aallartinnissaannut aporfik annertunerpaaq taakkartorneqartoq tassaasorinartippara piginnittup inatsisit malillugit pisariaqartinneqartumik tunniussiumanginnerat paasiartorujussuaq, inatsisimimi pinngitsoorani sanaartugassaq sunik akoqarnersoq ilisimanegaqqaartariaqartoq oqaatigineqallattaavoq.

INUIT ATAQATIGIIT INATSISARTUNI



Maanna Naalakkersuisut sanaartornermut malittarisassat (byggningsreglement) allanngortinniarlugu suliaqartut nalunngilara, taannali suli saqqummiunneqanngilaq. Neriutigiinnassavarput saqqummiussassami immikkut nunatsinni sanaartugassanik pigisatsinnik annertunerusumik atuinernulernissaq siunertarineqarsimassasoq tamannami pisariaqavimmat. Piumasaqaatinngortinneqarsinnaavoq sanaartornermi atortussianik nunatta tunniussinnaasaanik annertunerusumik sanaartortut ujartuillutillu atorluaanerussasut, tamanna nunatsinnuinnaq iluaqutaagani aammattaaq silap pissusiata allanngoriartorneranut iluaqutaasussaammat. Sanaartorniakkat sulluunniit nunatta pissarititaannik atorluaanerunikkut suleqatigiilluni nassaarsioraanni anguniagaq sukkanerusumik ingerlassaaq, assersuutigalugu savat meqqi illunut oqorsaatitut atorsinnaasut atorluarneqanngillat. Aqqutissiuvisariaqarpugut nunatta avataaniit eqqussuinerujussuaq unikaallaatittariaqarparput.

Qujanaq.